

卷十

人物志

前哲 孝義

隱逸 義勇

重修臨潁縣志

重修臨潁縣志卷十

陳垣東園

邑令 陳俊冊囊 重修

楊酉桂 光辰

人物志

前哲

封歷鄉者附

孝義 隱逸 義勇

伎術義民附

南宋

荀伯子潁川潁陰人晉驃騎將軍羨之孫也父猗祕書郎伯子少好學博覽經傳而通率好為雜語遨遊閭里故以此失清途解褐駙馬都尉奉朝請員外散騎侍郎著作郎徐廣重其才學舉伯子及

王詔之並爲佐郎同撰晉史及著桓元等傳遷尙書祠都郎義熙
元年上表稱故太傅鉅平侯羊祜勳參佐命功盛平吳而享嗣闕
然蒸嘗莫寄漢以蕭何元功故絕無輒紹愚謂鉅平之封宜同鄼
國故太尉廣陵公陳淮黨翼孫秀禍加淮南竊饗大國因罪爲利
會西朝政刑失裁中興復因而不奪今王道惟新豈可不大刊臧
否謂廣陵之國宜在削除故太保衛瓘本爵菑陽縣公旣被橫禍
乃進第秩加贈蘭陵又轉江夏中朝公輔多非理終瓘功德不殊

亦無絳獨受偏貨宜復本封以正國章詔付門下前啟騎常侍江夏公衛瓘及穎川陳茂先各自陳先代勳不伏貶降詔皆付門下

並不施行伯子爲妻弟謝晦薦達爲尙書左丞出補臨川內史車
騎將軍王弘稱伯子沉重不華有平陽侯之風伯子常自訟藉蔭
之美謂弘曰天下膏粱唯使君與下官耳宣明之徒不足數也遷
散騎常侍又上表曰百官位次陳留王在零陵王上臣愚竊以爲
疑昔武王克殷封神農後於焦黃帝後於祝帝堯後於薊帝舜後
於陳夏后後於杞殷後於宋杞陳並爲列國而薊祝焦無聞斯則
褒崇所承優於遠代之顯驗也是以春秋次序諸侯宋居杞陳之
上考之近代事亦有徵晉泰始元年詔賜山陽公劉康子弟一人

爵關內侯衛公姬署宋侯孔紹子弟一人駙馬都尉又秦始皇三年太常上言博士劉嘉等議稱衛公署於大晉在三恪之數應降稱侯臣以爲零陵王位宜在陳留之上從之爲御史中丞莅職勤恪有匪躬之稱立朝正色衆咸憚之凡所奏劾莫不深相訶毀或延及祖禰示其切直又頗雜嘲戲故世人以此非之補司徒左長史卒於東陽太守文集傳於世子赤松爲尙書右丞以徐湛之黨爲元凶所殺伯子族弟和字茂祖與伯子絕服元嘉初以文義至中書郎昶子萬秋萬秋字元寶亦用才學自顯昶見釋慧琳謂曰昨

萬秋對策欲以相示答曰此不須看若非先見而答貧道不能爲
若先見而答貧道奴皆能爲昶曰此將不傷道德耶答曰大德所
以不德乃相對笑竟不看焉萬秋孝武初爲晉陵太守坐於郡立
華林閣置主衣主書下獄免前廢帝末爲御史中丞卒官

豐氏增

荀雝字道雝臨穎人官至員外散騎侍郎與會稽謝靈運族弟惠連
東海何長瑜太山羊濬之以文章賞會共爲山澤之遊時人謂之
五友然四人皆不壽而雝獨令終豈所謂器識勝者耶

肥賢鄉

荀子華臨穎人或族也元嘉中以何尙之爲丹陽尹爲立宅南郭外

倚宅立學命聚生徒謂之南學時子華與東海徐秀廬江何曇太原孫宗昌王廷秀魯郡孔惠宣並慕道來遊時人咸推重焉

祀賢鄉

荀僧韶臨潁人陳郡長平殷孝祖之甥也位司徒參軍明帝初卽位四方反叛僧韶建議請卽命徵兗州刺史殷孝祖入朝上遣之時徐州刺史薛安都舉兵附晉安王子勛遣薛索兒屯據津徑僧韶間行得至說孝祖曰景和凶狂開闢未有主上曾不浹辰夷凶翦暴國亂朝危宜立長君公卿百辟人無異議舅少有立功之志長以氣節成名若能控河濟義勇還奉朝廷非惟匡主靖亂乃可垂

名竹帛孝祖卽日棄妻子率文武二千餘人隨僧詔還都時普天
同逆朝廷惟保丹陽一郡孝祖忽至人情於是大安

祀鄉賢

陳

荀朗字深明臨潁人祖延孝梁潁川太守父伯道梁衛尉卿少慷慨
有將帥略起家廬陵王行參軍初侯景之亂招徒旅據巢湖間無
所屬臺城陷簡文帝密詔授雲麾將軍豫州刺史令與外蕃討景
景使宋子仙任約等頻攻之朗據山砦自守不能克時京師大饑
百姓皆江外就食朗更招致部曲解衣推食以相賑贍衆至數萬

人侯景敗於巴陵朗出自濡須截景破其後軍王僧辨東討朗遣其將范寶勝及弟曉領兵三千助之景平後又別破齊將郭元建於踟躕山承聖二年率部曲萬餘家濟江居宣城郡陳霸先入輔有篡萌矣齊遣其將蕭軌等據石頭城討之朗自宣城來赴與侯安都等大破齊軍霸先既篡賜爵興甯縣侯邑二千戶尋遣隨臨川王拒王琳於南皖霸先殂其后與舍人蔡景歷祕不發喪朗弟曉謀率兵襲臺爲景歷所殺仍繫其兄弟舊立旋釋之因厚慰朗令拒琳琳平遷都督霍晉合三州諸軍事合州刺史天嘉六年卒

諡曰壯兄昂以朗破蕭軌功拜左衛將軍弟晷拜太子右衛率子
法尙襲爵歷都督郢巴武三州諸軍事郢州刺史及隋軍濟江降
秦王俊麾下歷仕巴東燉煌二郡太守

魏祀鄉賢

元魏

荀濟字子通臨潁人僑居江左初與梁主衍爲布衣交知其當王然
負氣不服謂人曰會當於鼻楯上磨墨作檄文或稱其才於梁主
衍衍曰此人好亂者也濟上書譏佛法言營費太甚衍將殺之遂
奔魏時高歡死子澄踵其父惡欲篡魏濟謀誅之事洩被執澄惜

其才將不殺謂曰苟公何意反濟曰奉詔誅高澄何謂反於是殺之鄰下士大夫多傳其音韻

祀鄉賢

北齊

荀仲舉字士高臨潁人僑居江南仕爲南沙令被執於齊齊長樂王

高燦甚禮之後爲義甯太守

祀鄉賢

北周

韓襄字宏業潁川潁陽人也祖瓌魏平涼郡守安定郡公父演恆州刺史襄少有志尙好學而不守章句其師怪問之對曰文字之

間常奉訓誘至於商較異同請從所好師因此奇之及長涉獵經史深沉有遠略屬魏室喪亂避地夏州時周文帝爲刺史素聞其名待以客禮及賀拔岳爲侯莫陳悅所害諸將遣使迎周文周文問以去留之計襄曰此天授也何可疑乎周文納焉及爲丞相引爲錄事參軍賜姓侯呂陵氏大統初遷行臺左丞賜爵三水縣伯丞相府從事中郎出鎮浙酈居二年徵拜丞相府司馬進爵爲侯出爲北雍州刺史州帶北山多有盜賊襄密訪之並豪右所爲也而陽不之知厚加禮遇謂曰刺史起自書生安知督盜所賴卿等

共分其憂耳乃悉召傑黠少年素爲鄉里患者置爲主帥分其地
界有盜發而不獲者以故縱論於是諸被署者莫不惶懼皆首伏
曰前盜發者並某等爲之所有徒侶皆列其姓名或亡命隱匿者
亦悉言其所在褒乃取盜名簿藏之因大榜州門曰自知行盜者
可急來首卽除其罪盡今月不首者顯戮其身籍沒妻子以賞前
首者旬日之間諸盜咸悉首盡褒取名簿勘之一無差異並原其
罪許以自新由是羣盜屏息入爲給事黃門侍郎遷侍中除都督
西涼州刺史羌胡之俗輕貧弱尙富豪豪富之家侵漁百姓同於

僕隸故貧者日削豪者益富褒乃悉募貧人以充兵士優復其家
蠲免徭賦又調富人財物以振給之每西域商貨至又先盡貧者
市之於是貧富漸均戶口殷實廢帝元年爲會州刺史後以驃騎
大將軍開府儀同三司進爵爲公累遷汾州刺史先是齊寇數入
人廢耕桑前後刺史莫能防扞褒至適會寇來乃不下屬縣人旣
不備以故多被抄掠齊人喜於不覺以爲州先未集兵今還必不
能追躡由是益懈不爲營壘褒已先勒精銳伏北山中分據險阻
邀其歸路乘其衆怠縱伏擊之盡復其衆故事獲生口者並送京

師褒因是奏曰所獲賊衆不足爲多俘而辱之但益其忿耳請一切放還以德報怨有詔許焉自此抄兵頗息遷河州總管仍轉鳳州刺史尋以年老請致事詔許之天和五年拜少保褒歷事三帝以忠厚見知武帝深相敬重常以師道處之每入朝見必有詔令坐然始論政事卒贈涇岐燕三州史史諡曰貞子繼伯嗣仕隋位終衛尉少卿北史論曰韓褒奉事三帝以忠厚知名

依豐氏增入

唐

賈崇俊臨穎人漢膠東侯復二十二代孫也復支孫宗嗣父邯爲

卽墨侯宗孫建尙和帝女臨潁長公主始居臨潁至唐有崇俊者
以功業顯於時封河東縣開國公食邑五千戶卒葬臨潁西十里
其銘有心盡朋友義感風雲酬恩誓死豈顧殊勳云云

祀鄉賢

宋

李兌字子西許州臨潁人登進士第由屯田員外郎爲殿中侍御史
按齊州叛卒獄成有欲夜篡囚者兌以便宜斬之人服其略張堯
佐判河陽兌言堯佐素無行能不宜以戚里故用改同知諫院狄
青宣撫廣西任守忠爲副兌言以宦者觀軍容致主將擊肘非計

仁宗爲罷守忠太常新樂成王拱辰以爲十二鍾磬一以黃鍾爲律與古異胡瑗及阮逸亦言聲不能諧詔近臣集議久而不決兌言樂之道廣大微妙非知音入神詎容輕議願參新舊但取諧和近雅者合而用之進侍御史知雜事擢天章閣待制知諫院轉運使制祿與郡守殊時有用彈劾奪節及老疾請郡者一切得仍俸稍兌言非所以勸沮乃詔悉依所居官格兌在言職十年凡所論諫不自表暴故鮮傳世出知杭州帝書安民二字以寵徙越州加龍圖閣直學士知廣州南人謂自劉氏納土後獨兌著清節遷

知河陽帝又寵以詩徙鄧州有富人榜僕死係頸投井中而以縊
爲解兌曰旣赴井復自縊有是理乎必吏受賕教之爾訊之果然
兌歷守名郡爲政簡嚴老益精明自鄧歸泊然無仕宦意對便殿
力丐退英宗命無拜以爲集賢院學士判西京御史臺積官尙書
右丞轉工部尙書致仕卒時年七十六諡曰莊祀鄉賢

李先字淵宗兌從弟起家進士爲虔州觀察推官攝吉州永新令兩
州俗尙訟先爲辨枉直皆得其平知信州南安軍撫楚州歷利梓
江東淮南轉運使壽春民陳氏施僧田其後貧弱往丐食僧所而

僧逐之取僧園中筍遂執以爲盜先詰得其由奪田之半以還所
至治官如家人目以俚語在信爲錯安頭謂無貌而有材也在楚
爲照天燭稱其明也楚有民迫於輸賦殺牛鬻之里胥白於官
先愍焉但令與杖通判孫龍舒以爲徒刑毀其案明日龍舒來先
引囚曰汝罪應杖以通判貸汝矣遣之出積官至秘書監致仕兄
兌尙無恙事之彌篤子廷玉官太中大夫有政績年六十卽棄官
歸養先事兄兌能盡弟道而廷玉事父以孝聞時人皆賢其家法

金

張穀字伯英許州臨潁人大定二十八年進士調甯陵縣主簿改秦定軍節度判官率儒士行鄉飲酒禮改同州觀察判官是時出兵備邊州徵箭十萬數制翎以鵬鴈羽爲之其價翔躍不可得穀曰矢去物也何羽不可節度使曰當須省報穀曰州距京師二千里如民急何萬一有責下官身任其咎令出一日之間價減數倍尙書省竟如所請補尙書省令史除同知鄭州防禦使事改北京鹽使丁父憂服除再遷監察御使從伐宋遷武寧軍節度副使居母

憂貞祐二年改惠民司令歷河南治中隰州刺史刑部郎中同知
河南府事遷河東南路轉運使權行六部尙書安撫使興定元年
以疾卒穀天性孝友任子悉先諸弟俸入所得亦委弟掌之未嘗
問有無善書評者以爲有顏魯公風

祀鄉賢

李元英太和中進士授邲縣主簿下車首謁文廟祭器不堪薦羞徹
而更造如式講堂加齋舍悉修葺其爲政知先務如此

祀鄉賢

元

盧元誠恪自守不爲流俗所移嘗避地鄭之管城又如汴墾蕪地以

致饒舉充鄭州六縣課稅長任事數年投牒去歲時伏臘與鄉人擊鮮具釀爲樂居課子弟讀書世慮一不少櫻祀鄉賢

楊明至元間官播州宣撫司鈐轄改深州吏目性好學見鄉閭讀書子弟懇懇慰勉嘗以世之布施僧寺者爲非因捐產作贍學地入本縣以爲衆勸祀鄉賢

盧壬博覽經史挺然有守薦爲襄城主簿以文學飾吏事聲績爲當時所推重擢鄭州課官子天祥天祐天瑞并以文學稱天祥仕至閩海道提刑使天祐翊忠校尉行軍把總天瑞靖江縣尹祀鄉賢

鐵文中幼嗜學有才望至正間任監察御史性鯁直有古臺諫之風

肥鄉賢

明

吳孔彰才識超卓博通經史值元季不干仕進隱居明道洪武初以

儒士薦累官至山西右布政使

肥鄉賢

世家寶性剛果有謀略知兵善辨論仕元爲集賢學士守山東登萊
諸郡洪武初王師至寶以城降授大理寺少卿進禮部侍郎刑部

尙書

肥鄉賢

李凱以歲貢官給事中沈靜寡欲忠直不憚每諫務在必行洪武間以言獲罪除籍越數年帝忽思凱忠直趣召入朝行至中途暴疾

卒
祀鄉賢

耿俊字士賢少穎悟天性仁孝美髯髯修軀豐儀見者以爲神舉明經授隴州訓導復除金堂及重慶皆勤於訓迪清苦自厲人以爲有蘇湖風嘗思及父母輒泣下遂爲潁水松楸圖以識不忘士大夫有詩贈之三載考績通政引奏上奇之擬授黃門給舍旣而曰髯已過臍非遐齡遂罷陞榮河教諭卒於官士子哀慕之肖像於

文昌祠東歲時奉祀子舉明經者二益亨授甯夏中衛經歷改忠
義後衛廣覽治聞介潔不苟謙亨授保安訓導改蓬萊教人有方
二邑式之孫瑁武定軍民府照磨以孝友聞居官廉謹多矜閱意
滇南號曰耿佛子

祀鄉賢

嚴節字好信以舉人任盧龍令改黃縣令擢臨洮知府順天府丞爲

政公平去任民猶思之

祀鄉賢

劉禮字希文性醇樸器量不凡以貢入仕初任四川威靖衛經歷陞

湖南左布政使有爲有守政聲大著

祀鄉賢

程達字德孚少負奇氣有才名由歲薦爲御史多所建白以言坐罪除籍歸途惟一僕負擔居縣西郭外茅茨三間衣服弗能給坦然無憂色時有劉中丞者南行謁達惟揖門外命縣令曰程先生一寒至此亟爲構室贈粟以濟縣令從之後令趙鍾見達寒甚爲架梁棟一所昇之門達固辭鍾遂以爲社稷壇神庫云祀鄉賢康熙間知縣沈公近思封其墓題曰清節先生

趙禮字宗和篤學善文雅有操行以尙書魁鄉試尤精於易授秦州學正善教人及門之士多俊乂厯官數年雖戎官戍卒無弗愛重

焉孫珍字邦瑞以禮經舉授盩厔教諭遷大名教授改真定性骨
鯁教子弟嚴憚有法珍子光以禮經舉進士拜南院監察御史陞

江西僉事理屯政政紀肅然

祀鄉賢

王睿字思聰英敏有才識歲貢入監授東安令視篆以十五事諭民

切中時弊逾年政平訟理宣德中舉循良陞合州知州民詣闕奏

留者幾三千人得旨以知州管縣事祭酒夏宗魯寄詩有勞心勤

撫字賣馬濟艱難之語自是精力益奮累疏民隱中官侯泰嘗奪

東安民田數頃睿奏之竟如所請其終始愛民不畏強禦類如此

卒於官後六十年曾孫金登進士以事至東安遇老僧猶記睿惠
政金有詩略云老釋能言前度事古槐堪識舊時居十年遺愛暉
芳草千載香名注史書金字曰良初授工部主事管通州諸閘豪
右無敢私其利者尋差浙江抽分清操愈厲宿弊頓革遷刑部員
外持法明允冤抑多所平反陞浙江僉事會兩浙大饑入境卽發
廩賑貸時中官鎮守非賄則中禍守巡無敢抗者金至溫州其下
有白米千石投金金詰之對曰爲災傷冊并爲釋禍需耳金曰爲
民而殃民有是乎秀才至此亦何以畏懦爲遂揮去轉山東副使

時勅寇劉六劉七等猖獗金同邊帥剿捕之又驛傳諸弊金量地
革之民稱便擢福建按察使甫兩月威懷并著正德十一年卒於

鎮江

祀鄉賢

賈彬字文質平生以善自娛家貧甚臨財之際一介不苟人來假地
一言諾之終身不取暇惟閱史鑑意有所會豁如也居恆慕龐德
公以安遺子孫見爭訟不義輩輒退避不與共言鄉人稱厚德者
歸焉年九十卒

祀鄉賢

杜寧字安道以才幹任商河簿遷棗城丞政尚仁恕首建學兩地俱

刻石頌德致仕還處鄉以禮義廉隅肅然好施舍爲陰德事卒年

八十三 祀鄉賢

彭賢字仲德歲貢入監授太湖縣丞有能聲擢旌德知縣下車卽興

學校去姦慝一年卒于任士民痛惜之建企德祠祀焉 祀鄉賢

任原允朴如古人與物無競宣德中南陽保輸戶濟河登岸遺所襁

稅金尋泣回原收候在舟核實以歸襁識如初年八十卒 祀鄉賢

楊安字子寧以歲薦入監授江西德化知縣平易清謹一介無所苟

甚得民心引年歸惟樹木課農自舊田廬外無有加也教授鄉閭

子弟嚴而有法每勸以讀經史書其汲引後生有如此

祀鄉賢

谷善字元吉天資秀發書史一過目輒了大義貢入太學授清水知縣縣僻處邊陲號難治善馭以寬簡不事威猛且曉暢刑名吏事精絕狡黠之徒率多畏服時征討滿四上官切責有司餽運善奉檄供餉民素感善日夜恐後撫憲屢加獎勸及平時奏聞擢用善乃請老歸之日民攀送數十里有泣下者還家自書史外橐無長

物

祀鄉賢

黃繡字仲彰貢入太學授昌黎丞清操高誼一塵不染有異政當路

屢薦之陞代州判冰蘖之操愈堅後解官歸宏治初河南巡案代州王公瓊過潁謁繡出語左右曰此老鐵石肝腸也父正爲麟遊令廉名著聞子淵爲平山令轉文縣兩地俱有清名今百姓尙思之祀鄉賢

邢曙字克明垂髫卽好學老而不倦爲人耿介動止有繩尺未嘗輕言笑舉明經授應天府經歷居官廉謹人弗敢干以私有白府承者嘗以曲欲曙直之弗從遂以不合解職歸築塢構茅開池假山終年不入城市藝圃明農賦詩談道熙如也潁人謂歸田之樂未

有如曙者

祀鄉賢

楊盛字道隆強記洽聞靡書不覽所集有詩卷咸高古非時所及許
守二泉邵氏嘗輿迎至許與語古今事輒悅遂以許志托之因爲
作白雪莊記楊縉雲傳述盛才行人謂非溢美也先是盛爲縉雲
令但讀書談道鼓琴賦詩不知有所謂政也及入覲民爭持贖投
盛盛揮去曰今已乞休矣民泣去

祀鄉賢

任鑑字自明登進士除南京刑部主事章程練達訊獄明恕有長者
風遷員外郎陞四川副使整飭瀘敘兵備鑑盛德重望期月卽剿

獲逆寇楊爵阿章保及羿蠻阿方阿路長甯敘州永甯始安丁父
憂還瀘州士民頌焉改湖廣副使擢雲南參政進按察使剋劃奸
欺神於卜著法惠並施南人悅服累遷至南京操江右副都御史

肥鄉賢

王潤字敷仁性耿介不爲流俗所移見人有過卽面折令其改圖由
舉人授西安府學訓導正身率人清苦自厲雖沍寒酷暑未嘗倦
於訓迪督學以潤爲清操第一遷國子監學正尋擢監察御史陞
兩江巡理鹽課時逆瑾簸弄威福賄賂公行潤差回獨無所餽遺

啣之遂中以禍嚴刑鞠訊桎梏數月免其官瑾誅復起爲監察御史陞陝西副使在陝三年肅清奸慝屢平冤獄累疏乞休歸惟耕

田藝圃教子課孫絕口不言世事

祀鄉賢

杜宏字淵之登進士爲阜城令吏畏民懷謳謠載路旁郡皆以訟來質時有奸人詐爲金賈招丐者作僮易金富家輒詆之致鬪乃毆丐者令傷還卽鳩死以要厚貲否則成獄有司弗能詰宏訊得其情置之極刑鄰封之民負冤者十餘氏遂釋朝廷錄其事以異政揭榜天下調山陰令聲實視阜城尤加擢山東道監察御史

祀鄉賢

趙景鸞年數歲遇母疾憂戚如成人母不食亦不食人慰之輒號泣
人以小孝子稱之及長事父母動息起居無不以身先之舉宏治
壬子鄉試既上選待次於家適父得癱疾晝侍左右夜卽臥於榻
前以身爲父耳目手足者五年比卒泣不欲生鄉鄰聞之無不殞
涕旣葬衰服不去體有間則讀喪禮世所尙浮屠道家之說一不
以自染或勸之曰吾先人安有此罪哉服闋除官歷日照南樂曹
縣令在曹時值黃河爲害民洶洶謂城朝夕不可恃乃亟築城濬
濠增築護隄民保無虞後數年水復冒城郭民競呼趙爺救護者

其聲如雷亦竟無事事定立痛定祠祀公以永福祐後歷陞荊州府判桂陽知州致仕

祀鄉賢

谷鍾仁字壽卿天性孝友居家動遵古道以舉人任武功縣縣小路要政久弛公一一振舉尤勁直不畏權勢嘗檢余錦衣行囊查四川鎮守中官關文人皆代爲危之逆瑾擅威福其屬居興平者數挾以請托公一切不入瑾銜之嗾吏部擬降級用公遂飄然歸對山康氏嘗言吾令居吾邑善張弛敏辦不屈一時爲令者莫加也

其推重如此

祀鄉賢

梁錦字美中登進士授南京戶部主事幼負奇氣與人議論輒責備弗少容人皆憚之在官雖檢點萬全尙疑有隙權舟淮上再權上

清河毫髮無所玷時論歸焉陞員外轉禮部郎中卒

祀鄉賢

邢城字維翰少失母天性孝友兒時卽動履介潔聰慧善記爲文雅有桀矧長舉明經授淮安府判視事卽以廉能著稱爲政寬平簡易上官重其才嘗令代領鹽法固辭上官曰此廉吏也卒于官待賻始克歛民益懷之

祀鄉賢

谷鍾麟字振卿居恆矜氣節然衷殊坦易舉於鄉授旌德令旌畿邑

難治其宮寺多良田豪右故占爲業例不賦調公下令更之一切
譏讒不聽必如令迺已會有權貴人行縣率媚之及旌吏以告公
曰吾縣貧安能事此既至果以肩輿弗華鞭吏流血公大不樂曰
車澤人必瘁吾忍以是求容吾去晚矣亟解印綬歸瀟然治舊田
圃詩酒自怡不復及世事所著有願學稿三卷存於家

祀鄉賢

杜進天性剛介淹貫經史以貢授九江通判夙夜淬厲一以整肅從
事吏民畏服境內有山盜上官命往捕之進諭以理不悛始治兵
攻之盜奔潰嘗署湖口彭澤二縣事籍帑資爲出納不事增羨近

江多潦塗命璧之卽日成通塗行政一年遠邇稱快一日見兩頭
蛇曰吾數奇矣果卒百姓哀悼之建仰高祠立遺愛碑子柙桐同
榜進士柙官至都察院左僉都御史協理院事風紀振肅得臺臣

體祀鄉賢

賈汝淮字鎮南素無宦情正德癸酉舉於鄉授猗氏知縣甫二年棄
官歸猗民爭遮留之不可至今思之祀鄉賢

賈詠字鳴和宏治己酉解元丙辰登第改翰林庶吉士授編修修孝
廟實錄逆瑾亂政守正不阿黜爲兵部主事遷禮部員外瑾誅復

除編修歷升南國子監察酒申明舊制六館率從又以諸屬職不
與風憲之選上疏請與北監一例從之尋改北陞禮部左侍郎與
議獻皇帝尊號被命承天題主改吏部左侍郎兼翰林學士入內
閣修武廟實錄陞禮部尙書兼文淵閣大學士參預機務實錄成
加太子太保武英殿大學士再修御製文集書傳三典寵賜優渥
益與二三元老協心匡輔太監閻宏奪民牧馬草場公疏論民佃
百年一旦遽奪俾失業恐生變定國公徐光祚欽賜薊州田已易
常州田矣復乞恩奏討公極論之並荷嘉納其因事納忠無所避

憚類如此嘉靖六年八月致仕家居杜門恪守置義田以贍宗族

二十二年詔賜存問年八十四卒贈太保諡文靖祀鄉賢

豐林按孫夏峯中州人物考賈文靖公詠字鳴和立朝有古大臣
風當是時方更化興治士皆喜趨事功好紛華詠醕德雅度挈綱
整紀納之太和不爲聲聞其所匡維調護甚多人不及知也落落
不苟合以老致仕雖不究厥施而脫屣榮名田野詠歌有洛社之
風焉文章醕雅暢達雖老猶著作不倦八十餘歲耳目聰明謙抑
眞坦若未嘗有官者人稱爲篤學君子云節錄

谷雍字汝來性耿直每以世之阿諛爲恥以薦仕元城令竟爲忌者
所中旣歸飄然世外結二三知己爲詩酒社不復問生產弟應早
卒撫其遺孤如己子官中裝亦推與之

祀賢鄉

邢守庭字紹男數歲從父別駕公城於淮別駕卒卽哀毀如成人太
守田公深加器重資遣歸久之成進士授行人擢兵科給事時當
嘉靖末朝廷懲曾銑王忬之禍噤不言兵公輒侃侃言邊事最後
爲簡閱五議法守四條皆報可下邊臣施行焉嘗有事張家灣歎
曰是且屯聚百萬爲禁輔不可無城亟疏請焉又倡諸大商爭輸

金遂告成嘗分校畿試會試元盡出門下而沈歸德公鯉卓然爲
萬歷朝名相故論者率多公知人仕至太常少卿

祀鄉賢

劉斯原字憲仲故從楚洞先生游於書傳有獨解筮仕守桂陽補隨

州遷太平丞所至吏事精絕靡不原本經術在桂陽嘗有事道州

謁濂溪祠竦然倍爲嚮往又與曾植齋先生論議往復政優輒學

因手輯大儒文要及大學古今本通考十餘卷遷衡王相王深禮

重爲梓其書行世

祀鄉賢

趙可學字子可性穎異七歲能詩既長博極羣籍以至律歷書數山

經海志無不曉暢爲文殊雄渾頃刻千言可就以貢士爲懷慶訓
自以迂疏不能與時俛仰陞絳縣諭不就歸卽所居構小舍左右
列圖史日披閱其中不遑及他事蔬素時不給亦泊然不屑也嘗
爲穎先朝文獻錄慨然曰近世誠難言夫於前代又何諱何忌不
以直筆評乎故凡附曹輩如荀文若陳長文者皆痛詆之因自號

古愚學者稱爲古愚先生

祀鄉賢

姚德溥字惟修號澤寰萬厯己酉舉人幼穎悟博及羣書學有心得
教授生徒從遊者如王鼎鎮崔攀龍未正中皆一時名儒談理學

者率歸焉丙辰授固始教諭日嚴講課引經析疑人以比之月川
先生戊午鄉試第一人唐時明則公門下士也辛酉陞禹城令值
大旱人相食發倉賑濟全活萬餘人課農桑興學校驛站苦民置

驛田二十頃分給馬戶百姓便之時妖賊起攻陷城邑公緝其渠
魁陳龍登等修城池固守禦未雨綢繆至今人皆多公之功焉卒

祀禹城名宦有去思碑

祀鄉賢未正中未字疑誤

谷之東字汾陽少好學弱冠領鄉薦博極羣書邃于名理布衣疏食
晏如也性至孤介一毫不苟取於縣父母終其身無一干請高密

張侯見其茅屋數椽不蔽風日爲之築室以居其見敬禮如此世
既多張侯之賢而復方之東爲徐孺子云

祀鄉賢

崔攀龍字翰如少穎悟有才名十四遊邑庠每試輒最偉儀容望之
森然可畏溫厚和平而豁達多大節高密張侯深器重之靳侯一
見奇之曰此豈池中物也崇禎癸酉登賢書屢上春官俱報罷閉
戶自守人咸以長者稱之事父母能順志無違公行四於諸兄備
盡恭讓毫無私恡及析居腴產沃壤盡讓諸兄而自取其瘠者其
諸侄及族人之俊秀者皆爲延師教之貧者仍給其衣食孝友嫻

睦人稱之無間言崇禎十三年大饑盡出所蓄周濟族人既不能給至鬻其服飾器物無愛焉公素明太乙知將亂率鄉鄰築寨曰平甯爲避亂計所保全者數千家人以是益德之明季就福建南安教尋遷建甯縣令甫下車卽修考亭書院進諸生以討論性理士風翕然不變詢民疾苦利者興之弊者除之清條編均里甲訖稅如程至無可答上臺奇其治擬擢授兵曹尋卒于官長子琮殉

焉

肥鄉賢 宋達盛曰翰如之和汾陽之介頴水之上兩異人焉

備疑

曹琛元大德間敕授襄陽路儒學教授

南公權大德間爲嵩州同知

王義甫元末爲行軍斷事

順治志三人殊無事跡可見或者修實而不務名與或無爲之表揚與俱不可知也姑附之備疑考德擬行庶其有當于公論也乎

乾隆志

清

王應泰字如皞天性質直學問淵雅以歲貢官河津知縣政平民

愛以憂去官先是明季寇亂盜賊蠡起民不能一日居應泰慨然集同志數輩如崔攀龍宋紹統諸人招納勇士保衛桑梓解紛赴難周百里賴以全活亂既定人不知學應泰慮之自任以師道之重開館結社教授生徒或周給貧乏或體貌賢雋宋逢泰逢盛逢期之爲學成名皆應泰獎借之力也

宋紹統智勇人也行己謙下臨事明決明季亂方滋崔攀龍嘗築砦平寧城鄉人賴爲保障攀龍去後紹統繼之守戰之備名聞遐邇迨天下大定紹統由歲貢官修武訓導歿後鄉人思之立碑奉祠

焉

宋逢泰字公豫又號東穎性篤孝登順治十二年乙未進士父母已
逝聞報泣下以不得祿養爲恨官北直唐縣知縣賞罰嚴明有政
聲行取禮部主事清勤自勵以病告休

宋逢盛字謙豫又號湄性開敏好學不倦登順治丁酉鄉榜官瀘
溪知縣刑清政簡不爲時俗所移

宋逢期字際五喜讀書常以嘉惠後學爲己任由歲貢任澠池教諭
憫大亂之後文教未塲乃集塾師定程課日遊覽於鄉學村館之

中察其惰勤考其優劣勞者獎之怠者罰之積數年士風不振解組後林下優游著述見志嘗採先民嘉言懿行及時事觀感可風者曰日用指南爲鄉黨矜式卒鄉人祠之

潘文彩字含素順治八年恩拔貢十六年選湖廣東安知縣其地訟獄皆先入金婚書必用官印公至盡裁革民習玩法抗賦稅公勸諭之無逋欠久之懷德畏威咸呼青天焉時巡按過境各官皆有饋獻公獨無後巡按敗查贓款無公名遂奉獎爲清官第一十七年遷山東寧海知州水賊擄掠爲害公率丁壯搗其穴焚勦之民

賴以安尋登州屬饑詳災請賑僚屬啣公介直控詳蓬萊境失鞘
爲甯海界竟革職留任勒緝以憂卒子執中訟知府知府理屈被

黜事乃白

舊志失載今補入

潘執中字允恭性誠慤坦白無隱由舉人授汝州學正訓課有法士
論翁服一旦土寇竊發薄城下州牧偕執中登陴守禦賊望見熟
視之曰潘公也勿犯去之年八十餘卒官汝人感焉立碑記事

新志

銀文昭乾隆辛巳進士授吏部主事遷文選司郎中距今百數十年

其品行學術世無能道所著有四書辨異易經圖解春秋心得諸書稿未付梓易稿序見藝文志其元孫多山邑庠生能傳家學詩書餘澤數世未艾非所謂抱道之君子者歟

陳際丙字焯南一字環渚乾隆丁酉科舉人四歲失恃事祖母以孝聞性開敏於書無所不讀年二十六入邑庠時從學者日衆嘗以文受蔡葛山相國寶東臯總憲知隣郡知名之士皆樂與結友六十一領鄉薦又三十年截取知縣不仕也授國子監學正銜生平以不及事母每祭輒悲感孺慕終身友于兄弟弟有客死者破產

歸骨而撫其孤其他義舉尙多不及詳載

宋沼由監生歷宰福建詔安歸化等縣擢永春直隸州知州行政廉明遇人謙謹值荒歲捐俸助賑歸田之日囊中衣被圖書而外無長物也子孫守其家範安貧樂業不入公門

潘世篤字蓋臣道光乙未舉人豁達有大志居家敦孝行睦族誼排難解紛鄉黨頌德七上春官不第咸豐三年大挑二等選修武通許教諭皆以丁外內艱未到任八年授滎澤訓導寒毡自守恆以祿不逮養爲憾同治元年捻匪犯城公守禦有方時逃難民集城

下門弗啓衆洶洶公白令開門納之民悅服同治四年截取知縣引見後開缺候選光緒三年授甘肅渭源知縣時左文襄公督師駐肅州赴營稟見文襄曰渭地苦極治何先公以撫綏招徠對文襄然之及到任卒踐其言四年致仕歸修理先塋清貧如故設帳授徒依然舊書生也著有論語學庸節解稿待梓

陳星聚字耀堂性沉毅讀書務窮理遇人厚而持己嚴道光己酉舉人咸豐間皖匪出沒縣境以守城功薦知縣選知順昌時閩省郡邑類陷沒順昌賊尤猖獗營卒之凶頑客民之暴橫民不聊生也

星聚至官迭用剛柔兼施威惠始連官民爲一體左文襄公賢之薦於朝交軍機處記名升用充丁卯科簾差調知建安縣益捐俸修復書院考棚添置義塾文風日振起調知閩縣以清理詞訟爲政源沈文肅王文惠兩公目之爲純儒循吏也洋人建礮臺於海口星聚職微禁止不可去知仙遊仙遊俗好鬪且健訟爲編八戒十勸歌民讀之有泣下者知古田有水口鄉地爲鄰邑勢紳所奪力爭復之縣民感德生祠祝焉擢淡水同知以治盜稱厯漉港同知陞臺北知府問政省俗尤以繕修城池爲首務工甫竣而法

國衅端起矣當是時內外隔絕援兵久不至乃竭貲募勇修其守禦爲全臺北門鎖鑰以勞疽發背卒年六十有九紳民請恤御賜祭葬如例先是光緒三年豫省大饑道殣相望星聚捐穀千石又賑本鄉穀數百石急公好義略可見矣

張鼎字子頤恩貢生平居教授生徒士之有才品者日從游焉門弟子鄭思玖食餼早歿遺孤子性中無所託鼎幼撫之立長教之讀歷十八年如一日未嘗怠也咸豐間皖匪屢犯境以守城功薦教職授通許教諭未任卒

薛凌雲字步月附貢生性靈敏有幹濟才少與吳貫三譚寅賓爲莫逆交暇輒過從以道義相切劘城西龍堂渚河頻決爲害縣令知公才委令督築公至相度形勢指授方略卒塞數年之決口不復爲患至今父老猶樂道之咸豐末年皖匪擾境公與陳公星聚等助城守備卒保無虞尋以前後修河守城功保教諭選延津縣到任卽以端士習振文風爲己任光緒三年歲大饑奉憲委同延令賑濟散給公允延民頒德十三年河決鄭州公撰治河策並繪圖以獻大府嘉納著學宮譜一卷學使邵松年爲之序刊板行世陞

彰德府教授卒於官公治家有法同爨六十餘口無間言課子若孫甚嚴自塾解歸輒爲之宣講文藝弗倦及官延津復令隨任誦讀以故入庠食餼者若姪光宗光昭孫燦珣姪孫燦離師保師泉後先接踵一門濟濟焉

李仁涵字宇亭原名汝霖父書紳有孝行好讀書生六子長汝雯弱冠食餼早亡三汝霖庠生仁涵其次也性沈毅篤學能文銳志上進前邑侯劉公瀛賓攝縣事博學愛士閱其文器重之期以遠到已果於光緒甲午領鄉薦旣上春官不第而志益厲充潁川書院

山長及高等小學堂教習勤於訓迪以成就人材爲心光緒末罷鄉會試改新章詔各行省督撫保送舉貢試京師仁涵與焉及試名列一等以知縣用分發江西到省年餘奉委解京餉仁涵體素弱有羸疾以公差勞勩疾復作竟於次年卒仁涵幼時家頗豐及長已漸落苦坐寒氈廿餘年甫得一官未及展布遽賫志以終士論惜之

封廕

明

賈景山陝西行省參政以曾孫詠貴贈少保兼太子太保禮部尙書
武英殿大學士配張氏贈一品夫人

賈彬以孫詠貴歷贈少保兼太子太保禮部尙書武英殿大學士配
李氏贈一品夫人

賈瑛字宗玉以子詠貴歷贈少保兼太子太保禮部尙書武英殿大
學士配曹氏贈一品夫人

杜進字蓋臣江西九江府通判以子構貴贈奉政大夫通政使司左參議配姚氏封太宜人

尙俊眞定府經歷以子敬貴歷封承德郎刑部主事配楊氏封安人

邢敬漢陽河泊以子曙貴贈應天府經歷配劉氏贈孺人

任原字天宥以子鑑貴封承德郎刑部主事配吳氏封安人

王相字國柱以子金貴封承德郎工部主事配邢氏贈安人
繼配潘

氏封安人

梁禮字文節都察院司獄以子錦貴贈承德郎南京戶部主事配楊氏封安人

王海以子潤貴贈文林郎雲南道監察御史蔣氏配贈孺人

趙珍字邦瑞累官眞定府學教授以子光貴贈文林郎南京四川道監察御史配焦氏繼配沈氏俱贈孺人繼配張氏封孺人

杜瑄字文玉以子宏貴贈文林郎浙江山陰縣知縣配宋氏贈孺人師惠湖廣鹽山巡檢以子清貴封徵仕郎無爲州同

賈芳字馥之以子暉貴封徵仕郎中書科中書舍人配袁氏贈孺人

賈曄字允實以子鑰貴贈徵仕郎中書科中書舍人配張氏封孺人
賈蘭字佩之原任嘉興府通判封承德郎配趙氏繼配李氏俱贈安
人

邢城字維翰淮安府通判以子守庭貴贈中憲大夫順天府丞配杜
氏贈恭人

趙迪吉以子璧貴封徵仕郎萬泉都司永寧衛經歷配李氏贈孺
人

谷乾公安縣訓導以子師顏貴贈直隸沙河知縣配杜氏贈孺人

賈萱以父詠廕嘉靖四年入監

賈暄以祖詠廕嘉靖二十年入監仕至中書科舍人

賈鑰以曾祖詠廕嘉靖四十年入監仕至大理寺寺副

姚光以子德溥貴贈文林郎禹城縣知縣妻吳氏贈孺人

清

宋三階以子逢泰貴贈文林郎直隸保定府唐縣知縣配王氏

贈太孺人

宋五德以子逢泰貴贈文林郎直隸保定府唐縣知縣配楊氏封太

孺人

潘逢源以子世篤貴贈文林郎甘肅渭源縣知縣配魏氏贈太孺人
張奇策以子安封登仕郎汝州訓導

張珣以子豈封登仕郎盧氏訓導

陳璞以曾孫星聚貴封通奉大夫

陳肅雍以孫星聚貴封通奉大夫

張錫疇以子星聚貴封通奉大夫

王灌以子一儒贈修職郎南陽府學訓導

薛爾貴以子凌雲贈儒林郎彰德府教授

順治志封廕六代渥矣人臣自策名後此身已許之公違顧私哉
而上且念其私賜璽傳笏耀前裕後宜何如感激也封者亦唯是
訓孝課忠可藉乎報而廕則比於近代之任子文獻猶存典型是
依慎勿席驕長倣鮮克由禮令喬木中剪故國無色可也

鄉耆

宋三元正直不阿必忠必信

盧守金好義急公勤勞多績

李芳春敦厚周慎口無擇言

潘守桂忠信篤厚與物無競

順治志鄉耆之典朝廷所以敬老亦以彰德也故所舉必鄉里之齒而且賢者與之燕而優禮之使人知雖爲鄉人而苟能有德則遂爲朝廷之所重如斯也庶有聞其風而競勸者乎夫旣爲王者之所重而將以爲風則其人顧可苟焉已乎故於此四老者必各著其德以見其克稱乎耆而後之舉斯典者其亦無容濫也已

丁梁棟鄉飲介賓知縣梁璜以達尊有二題其門焉

宋湘乾隆時身赴 皇極殿千叟宴勅封耆老賜龍頭杖金牌

張邦祥壽一百有四歲乾隆五十六年 勅封耆老照例給銀三十

兩建坊加賞藍大緞一匹銀十兩

孝義

順治志孟子云人人親其親長其長而天下平又曰堯舜之道孝弟而已矣孝弟之義重矣重夫孝思不匱緣分伸情達罔極而無慚耳若夫花萼相映奕世載休義也而孝彌篤焉因擇其最著者得若干人以篤風化以厲薄俗固亦求治者之所不廢也志孝義

漢

胡元安說嵩鄭凱對朱寵曰穎陽胡元安體曾參之至行履樂正之
純業親沒泣血骨立形存精誠洞於神明雉兔集其左右

依豐氏增入

宋

荀瓊臨穎人鬪之裔也年十八復父仇於成都市以孝聞於時元嘉
末渡淮逢武陵王舉義爲元凶劭追兵所殺贈員外散騎常侍子
法超齊安福令卒于官孫斐梁鬱林太守征倅賊中流矢死

齊

荀匠字文師穎陰人晉太保勗九世孫也祖瓊年十五復父仇於成

都市以孝聞宋元嘉末度淮逢武陵王舉義爲元凶追兵所殺贈員外散騎侍郎父法超仕齊爲安福令卒官匠號慟氣絕身體皆冷至夜乃蘇旣而奔喪每宿江渚商旅不忍聞其哭聲梁天監元年其兄斐爲鬱林太守征俚賊爲流矢所中死於陣喪還匠迎於豫章望舟投水傍人赴救僅而得全及至家貧不時葬居父憂并兒服歷四年不出廬戶自括髮不復櫛沐髮皆禿落哭無時聲盡繼之以泣目皆皆爛形骸枯頰皮骨裁連雖家人不復識郡縣以狀言武帝詔遣中書舍人爲除服擢爲豫章王國左常侍匠雖卽

吉而毀頽逾甚外祖孫謙誠之曰主上以孝臨天下汝行過古人故擢汝此職非唯君父之命難拒故亦揚名後世所顯豈獨汝身哉匠乃拜竟以毀卒

南史論曰自澆風一起人倫毀薄蓋抑引之教導俗所先變里旌閭義存勸獎是以漢世士務修身故忠孝成俗至於乘軒服冕非此莫由晉宋以來風衰義缺刻身厲行事薄膏腴若使孝立閨庭忠被史策多發溝馱之中非出衣簪之下以此而言聲

教不亦卿大夫之恥乎

唐

朱忬性至孝母疾久不愈割股和藥以進疾頓瘥事聞詔旌其門

王丕繁昌人數世同居義聲滿鄉黨咸敬慕焉貞觀初賜粟帛旌其門縣令常以時存問復其家

明

高祚嘗割股療母疾有孝子之稱母亡親負土成墳高丈餘手植松柏廬墓三年朝夕哭之形骸憔悴人不復識終其身未嘗見齒

銀墳字伯和三歲失母事繼母陳能盡子道陳亦愛之如已出墳嘗

有疾陳調護備至且籲天曰此兒無母我有兒兒死我無生天曷
死余兒而活是兒墳旣長喜讀書史每述繼母恩未嘗不泣數行
下也異母弟訟不直法當杖墳詣案泣陳母德願以身代責邑侯
劉本淳孝弟人也感之痛失聲左右靡不泣下父卒墳哀毀骨立
知不起謂其諸子曰母德未報吾先母死抱恨終天矣屍毋葬也
宜焚之以警世之不能終事其親者陳氏哭墳無間且暮時人謂
是母是子爲天下尠云

張騰字升霄事母篤孝始終弗懈母卒哀毀踰禮及葬嘗泣墓側如

初喪然凡新果蔬不薦不以嘗仍及墓祝勸語畢痛哭僮僕園丁亦相戒候騰薦方食每獨行拊胷呼母泣移時終身未嘗變焉

陳大化縣諸生嘗以事親不能盡職者非子也母疾衣不解帶者數月未嘗一入私室母亡哀之至哭泣數日不食而卒

李度長者也事親孝篤於友愛有田二十餘頃盡與兩弟曰人各有才不才也年七十餘天啓七年邑侯李建和旌其門曰耆德榮壽崇禎四年邑侯靳光先旌其門曰義同張公

趙承恩事親以孝聞友愛諸弟父卒以所遺產讓之繼事伯母王氏

撫二孤若己子焉

陳則實純謹篤孝崇禎十四年四月十七日流寇掠邑境祖母老不能行父于陞以爲憂實乃負祖母避之俄而父遇賊實奮不顧身與賊戰死之

崔琮性篤孝明季從父攀龍官于閩之建陽父卒琮抱屍痛哭而絕妻賈氏大學士詠之後琮沒十有九歲悲痛不食踰月卒

清

郭存有孝行母病割股進之遂愈知縣郭孝旌其門曰誠堪風世

順治志特記孝義者何重本行也次于鄉賢者何也昔孔子論士而以宗族稱孝鄉黨稱弟次于行已有恥不辱君命故不敢以門內之修埒乎全德也孝經曰教民相愛莫善于孝教民禮順莫善于弟美教化式民行孝義固有特重也

新志

張時行字可亭監生有孝行樂善好義嘗侍母疾數月衣不解帶咸豐同治間寇盜頻仍非堅壁無以守凡修城築砦應派及本村夫工者往往出金錢獨任之光緒初歲饑有積穀百餘石盡以散之

族鄰晏子爲齊相待舉火者三百家時行一處士待舉火者亦數十家可以風矣

吳貫三字維綱性篤孝皖匪之亂被賊虜賊目見其容止問姓名以先生呼之戒其徒勿侵犯居數日賊欲携之行泣辭曰家有老母無人養乞放還賊異而釋之家居授徒學行爲鄉黨所欽重一生功名坎坷而一方先後成名者皆出其門學者至今思之光緒中邑侯劉公旌其門曰端人正士孫遵範弱冠食餼咸以爲善教之

報焉

薛之振事母孝母患癩疾時以難能之事與必無之物責之振之振能委曲設法以悅親心母疾忽平之振省試領鄉薦人謂孝德所感云

王長海字平濤叔祖乏嗣繼爲後養生送死致其哀禮遺田二十餘畝割半以養本生一兄病癱久勤醫藥一弟未娶爲納嬖焉

黃鳳翔字穎瑞增生少孤事母以孝聞族鄰爭慕焉家雖貧不營利祿殆謙退之君子歟

郎錫魁字梅庵幼喪父母繼母失慈終其身第盡子職卒能挽回母

心光緒十八年邑劉公舉其孝行旌曰風追老萊

魏書章母病蠱四肢盡腫與妻劉晝夜奉侍母終不起在日嘗畏雷葬後每值風雨必奔赴墓所呼曰兒在母勿驚一日夜半雷電大作書章急往弟書成亦至焉邑侯劉于澣旌曰孝子悌弟

孫繼先邑庠生母病三年不離床褥雖瑣事必躬親他子孫代不能慰貼母心也

孫萬祥以醫養母者也母自四十八歲患癱疾至於七十七壽終垂三十年一動一息皆萬祥奉養之勤人呼之爲孝子不媿也

孫萬敬母年八十而卒母垂老患癱疾四年不愈凡一飲啄一動靜皆體察而先得親心歿哀毀盡禮里人之稱孝者必搜指繼先萬祥萬敬也

婁振玉邑增生居家以孝友稱母疾親嘗湯藥歿祭掃外不出戶者三年與弟同居田產一委之曰各勤其事而已女兒寡貧而無子迎養之歿歸葬夫穴族子女三孤父母死不能葬聚泣一室代爲營葬並收養之完其婚嫁族人慶之死妻李少無依月給薪米以全其節有族人萬玉者爲人傭四十後始娶生一子在襁褓而萬

玉病篤招振玉至而泣曰吾死矣奈孤寡何延祖宗一線君之德也慨然任之萬玉竟不絕嗣當咸同間髮捻滋蔓振玉偕王逢泰招集鄉人結寨戰守遐邇賴以安焉

王逢泰字際昌庠生爲人有至性幼失恃事繼母謹咸同之際髮捻出沒汝潁間時承平久人不知兵逢泰約婁振玉協力同心修守備嚴教誡附近若瓦店楊斐諸寨皆失守而巨陵寨獨全縣令查公聞其名訪以守戰之法下其事於他寨皆獲無虞逢泰自經喪亂不復研舉業專究實學身體而力行之四方從遊士有所矜式

焉繼母春秋高偶病盡心醫藥且嘗糞以驗吉凶鄉黨或爭鬪興
訟必善言排解嘗告於衆曰逢泰年八十非公事未嘗入公門尤
好施與每值冬殘春暮貧乏之得其衣食者尤多次子鼎年十五
入邑庠

段振鐸字敬宣篤孝悌父老患殘疾湯藥眠起出入扶持十餘年未
嘗離左右及事兄如事父得佳食必先進之讀書不尙詞章自弱
冠遊泮惟致力於實用值亂尤喜談兵咸同間皖匪犯境邑侯查
以謙求才急得振鐸大悅委以繕城濬池建礮臺諸重任賊至分

城固守警備有方蕞爾孤城數年不陷於賊者振鐸有力焉獎五
品藍翎

張煥文字黼臣幼失怙長以經商起家事母孝其長姊適邢氏家綦
貧每以爲憂煥文體母心歲供其薪米旨甘無缺並教甥讀書母
沒不輟又慮不可以爲常割良田三十四畝與之稟官存案衣衾
棺槨皆豫爲之備此外鄉鄰貧乏施予尤夥不可勝紀好讀書親
近儒者與盧邦彥薛凌雲李德馨相友善子乃謙以廩生官尉氏
教諭後嗣繁盛殆厚德之報焉

陳昭範字佩文性孝友諸弟嘗患疫家人莫敢近昭範親調湯藥會諸弟皆愈昭範亦無恙光緒末年嘗辦本保學務他保多構訟獨昭範所辦無間言邑令陶瑤以好學不倦表其門

義勇

順治志勇非君子所尚也况其悖義者乎然而白刃當前懦夫削色則勇者出矣且有一時憤激計不返顧上足以抒君父之恥下足以快衆庶之怒除兇剪亂禁暴戢威慷慨赴義而國家每獲其用者夫亦何可少哉此叔孫通薦士于漢高不先從遊之士而先

大豪或以此也志義勇

漢

灌夫字仲孺潁陰人也父張孟嘗爲潁陰侯嬰舍人得幸因進之

師古曰進薦也至二千石故蒙灌氏姓爲灌孟吳楚反時潁陰侯灌

何爲將軍子何也屬太尉請灌孟爲校尉夫以千人與父俱灌孟年

老潁陰侯彊請之鬱鬱不得意故戰常陷堅遂死吳軍中漢法父

子俱從軍有死事者得與喪歸灌夫不肯隨喪歸奮曰願取吳王

若將軍頭以報父仇於是被甲持戟募軍中壯士所善願從者數

十人及出壁門莫敢前獨故人及從奴十數騎馳入吳軍至吳將
麾下所殺傷數十人不得前復馳還走入漢壁皆亡其奴獨與數
騎歸夫身中大創十餘適有良藥得無死夫創少瘳復請將軍曰
吾益知吳壁中曲折請復往將軍壯義之恐亡夫乃言太尉太尉
乃固止之吳已破灌夫名聞天下穎陰侯言之上上以夫爲中郎
將數月坐法免後家居長安中諸公莫弗稱之孝景時至代相

元魏

江豐臨穎人爲巡卒識大義能斷胡太后以淫恣致國內大亂其北

海王顥奔梁梁立爲魏帝遣將軍陳慶之輔之北爭魏幾成而敗

復自魏奔梁從轅轅出至臨穎豐擒斬之

北海王顥舊志作顥茲從豐氏稿

明

楊禮豪壯有膽略時有陳九者兄弟剽掠人亡敢問時有柴太守携

眷屬過宿九乘夜劫殺之其女十四名毛兒強之爲妻不從女後

逸出伏菰蘆間數日得抵禮禮問狀怒髮上指則曰是其盤互深

孰敢逼迺爲酒招九至縛詣官問之堅不承禮迺直出引壯士往

搜之得宦中裝封識盡可驗且屋後隙地白骨狼籍九與其諸兄

俱論死後人爲之立祀于城隍廟西廊俗呼楊五廟

康鉞嘉靖三年劇賊爲遠邇患官兵捕之賊躍戰屢免至是知縣鄭
嘏迺倡數百人直抵巢穴衆狼顧莫敢人惟鉞持兵而進衆生氣
百倍遂獲賊數十鉞竟遇害嘏率衆哭奠葬焉

邢晤號林泉德量膽略爲衆所服善舞雙刀崇禎七年寇劫小商橋
一帶晤率鄉勇擊之賊遯去十七年流寇數萬掠小商橋晤率衆
與戰所殺過當數創血滿混襠以刀拭目復鏖戰不屈己而賊掩
至衆寡不敵死之衆白于府贈扁曰壯氣猶生有古烈士風焉

姚允祥生員杜良棟千總皆邑人良棟宏曾孫也崇禎庚辰辛巳間巨賊袁老山一條龍土寇吳來慶吳自蘭等擁衆殺掠村落爲墟潛謀攻城勢已危殆知縣倫之楷設法守禦城賴以完皆允祥良棟之力也

王澤深 張奇策 郭毓英

王澤深府庠生崇禎十六年五營寇縣西北境掠人爲食以索牽肩骨爲行糧深與諸生張奇策民郭毓英婁習易等築寨自禦久之不能守以計緩其攻潛使人乞援他寨翌日救至戰於白橋殲之

深父兄俱沒撫諸兄遺孤恩義兼盡鄉黨重之知縣萬世祚旌曰
秉正不阿知縣梁璜旌曰獨行君子

婁習易唐婁師德裔有征南將軍過潁止習易舍與語大奇之堅約
偕行以老病辭邑侯萬世祚旌之舉爲省祭子二之俊邑庠生之
傑歲貢永寧訓導

清

鞏振元字殿掄候選訓導光祿寺署正銜年八十餘子信琪武舉人
一門文武生員六七人

劉清魁字燕俊邑武生年九十一子金華武解元一門文武生員十餘人兩人治家嚴而有法子若孫之成名皆素教也不唯年登耄耋福命略同卽歷事情形鄉黨名譽亦有不謀而合者咸同之朝皖匪滋擾燒殘殺掠過處成墟捍患禦侮莫若連村結砦爲當務之亟也振元清魁各能倡明大義集財募人一築繁城砦一築栢冢砦遠諮訓練之方廣儲守戰之具嚴其部武振其精神是以賊至如潮不驚涵湧賊退如壁誓掃塵氛境外或見摧傷而此獨稱鞏固且善則歸衆功不貪天天厚斯人有由來矣光緒五年繁城

之西潁水汜濫隄屢塞而屢決振元督衆興修衆亦輸將恐後輦土運石期年而成鉅功一念至誠立除患害仁之澤其利溥哉

韋金棟 宋坦平 趙敏修 陳穎彥

韋宋趙陳四人者皆皖匪之亂保衛家國臨陣戰鬥不顧其軀者也死事前後雖不同而忠義之氣上達於天廷矜閔之恩下慰於泉府名垂邑乘不朽也已同治二年秋賊破南江砦砦長從九品宋坦平趙敏修率團勇巷戰力盡而死同時破石佛砦例貢陳穎彥避兵砦中隨衆力戰而歿繁城砦砦長咸豐戊午武舉人韋金棟

帶團剿匪於四年戰亡於陣事聞各賜雲騎尉世職

晁濟川 譚辛毓 姚深源 毛世芳

晁譚姚毛諸人文能磨盾武亦提戈跡其死事之烈豈不毅然大丈

夫哉宜天恩矜閔之至也同治二年秋皖匪攻破瓦店砦別錄八月十四夜大

兩營牆圯賊詐曰西門破矣西門守文生晁濟川力不支不辱於賊南

門守文生譚辛毓砦陷義不獨生俱投死於水增生姚深源知巢

破無完卵也罵賊賊殺之文生毛世芳倉卒被執不屈而死事聞

各賜雲騎尉世職并贈濟川辛毓深源鹽運司知事銜廕一子入

監

十八烈士二十二團勇附

十八烈士者豈不幸哉男兒生逢天地多事之秋不死於流離必死於疾疫招魂何處埋骨何人也亦有親執干戈戰亡於陣其志雖烈其名不傳傳者千百之一二焉爾此十八烈士亦可以慰於地下矣咸同間皖匪之亂有從九品崔俊魏瑞雲議敍八品劉清民貢生趙桂森增生鄭宗惠附生徐積泰文生陸和雍黃承憲崔汝從唐鳳圖唐應歡史獻賢王均邱振甲監生馬景和俱後先死事

者也各給雲騎尉世職貢生鄭蘭芳贈布政司都事銜生員魏官
劉樹德俱贈鹽運司知事銜廕一子入監陣亡之團勇有二十二
人焉曰宋書融宋雲林王海林宋培元宋玉寶王昌宋宗榮宋貫
榮王新彥宋坤山宋六書于六年胡百祥馬廣林陳保馬科陳林
陳梁陳宗陳太陳喜太陳鬧各賜卹銀十二兩五錢

李位西字庚堂邑庠生才思靈雋善啓發人及門成就者甚衆貧而
好義咸豐九年皖匪擾境張潘築寨公約其族人尙省尙華出貲
獨修南門樓有公撰文刻石

王葵張潘砦砦長監生也附近百餘村歸其統屬駕馭一失立敗事
機寇患數年未致大創者人謂葵能忍辱負重云

陳殿魁字掄元王岡鎮人嘗以禦匪出力獎五品銜同治二年秋雨
賊破瓦店南江等砦王岡砦戒嚴賊果大至攻之急殿魁怒袒臂
揮戈勇氣百倍連發巨礮擊賊賊始退相持之際殿魁已感疾逾
月竟卒年四十有三子男二俱業農

崔喜三嘗共劉鳳池築平甯城砦守禦有法寇至無虞獎給六品軍
功

程照藜 滕鳴謙

程照藜生員高宗砦砦長也時當皖寇猖獗連破瓦店南江等砦三家店砦不能守乘夜逃散警報至援絕勢孤人心搖惑照藜激勸大義譬喻禍福乃能衆志成城堅守愈力嚴旣解復納遠邇流亡賑以饘粥義舉也

滕鳴謙字貞菴歲貢生參龍砦砦長聞賊連陷瓦店南江等砦人心驚駭不知計之所出鳴謙曰去無益也將何之堅壁死守策之上者也賊來攻鳴謙高坐敵樓舉樽閑雅夜則束草爲人執燈照耀

七晝夜不能陷賊疑其有謀去之

宋振清 薛光義 薛起榮

宋振清字永平監生避居瓦店砦砦失守脅降不屈賊殺之不得其尸

薛光義避難瓦店砦破奪圍出手一矛前行妻秦從賊逼秦投濠死
光義連殺賊門不勝亦投濠死年甫弱冠

薛起榮字子河監生瓦店砦助守者也見勢危岌率衆出戰敵卻矣
復追之竟死賊手邑侯劉于澣旌振清曰爲節多堅旌光義曰有

勇知方旌起榮曰見危授命

杜占魁武生也咸同間寇焰披猖所至迫脅男女輕之如螻蟻驅之如犬羊狎之如狙優賤之如奴隸凡有血氣者不同生此天地也一日擄男女多人閉置一所令數賊監守而衆方會食占魁倉卒欲奪之歸乃一人奮而前數賊驚與鬥身受重創裹血猶戰衆至鬪之義哉義哉

王步瀛字月槎天姿聰敏下筆成文塾師器重之以累於家務遂棄讀焉性抗爽不事町畦鄉里爭訟每得君一言而解卽有強悍鮮

不服者咸豐末年皖匪竄境人民驚惶君聯十餘村築萬全寨挑
選丁壯指授方略賊屢來攻輒大挫衄而去是時附近若大朱石
佛陳諸寨相繼失守而此寨獨完邑侯查公以君守寨有功保獎
五品花翎至今父老猶稱道弗置云

中華民國

秦文煥字光輔倜儻有勇略民國改元土匪竊發時撫標統領成慎
駐節繁城提倡鄉團文煥以功充申安社長後復屢立奇功縣長
陳公上其事兩給獎札文煥益感憤圖報卒逐賊至鄢陵孫耿寨

遇伏衆寡不敵力戰中彈死 仇之甚火其尸兩弟賁三銘四俱
受傷聞者流涕陳公爲立碑紀績并文以祭之 詳藝文志

滕富春豢龍保人民國三年春入申安保鄉團隊屢隨秦文煥勦匪
不避炮彈鋒刃爭先恐後竟與文煥同追匪殞命於孫耿寨之役

隱逸

順治志堯舜在上下有巢由易曰鴻漸于逵其羽可用爲儀是故
君子得時則駕不得時則隱譬如風霆雨露澤及於物而物感之
至若景星卿雲天下不蒙其功而見之則知爲祥瑞者非以其光

象所及乎而合德所在不以隱顯異也故進而以經綸翊世也則
事業重退而以志節厲世也則隱逸重志隱逸

夏

下隨司馬遷伯夷傳曰夏之時有下隨務光呂氏春秋曰下隨恥受
湯讓自投潁水而死張顯逸民傳稽康高士傳並言下隨投泅水
按潁呂覽作潁司馬著作泅云泅水在潁陽其實潁泅古字通用
禮潁衣一作泅衣可證也又下隨史記稱夏呂氏稱商若果不受
湯讓何必以死明志後世亡國之臣有應死而不死者豈下隨爲

夏民有商革命之初固死忠歟並存二說附論世之末

依豐氏增入

豐林按堯讓天下於許由巢父惡聞其言而洗耳樊豎牽犢且不飲其下流下隨復投此水以死溯四賢之高蹈皆潁水之前聞其流風蓋遠矣何後來巖穴之士異乎古人豈其老死溝壑湮沒而不彰歟吾於是有所慨焉

唐

武攸緒武后兄子也淡泊寡欲好易莊書變姓名賣卜長安市得錢輒委去初授太子舍人遷大都督府長史鴻臚少卿后革命封安

平郡王固辭官願隱居后遺其兄攸宜敦諭卒不起盤桓龍門少
室間冬居茅椒夏居石室所賜珍貴器塵積不御也市田潁陽使
家奴雜作自混於民中宗初以安車召苦祈還山詔可尋又以璽
書迫之既至帝敕有司卽兩儀殿設位行問道禮攸緒至山帔葛
巾更衣冠就常班再拜賜予無所受尋還山俄而諸韋誅禍連武
氏惟攸緒不及睿宗復詔拜不就仍賜嵩穎舊居令州縣存問景
日珍說嵩曰史傳攸緒辭官太后疑其詐許之以觀其所爲攸緒
安於巖壑遂以取信由是觀之當世奇才高識不能自晦而立於

其朝者深可惜矣夫夷惠俱稱聖然學惠而失則將有苟合媮容
之行學夷不至未失爲守道潔身之士君子立品制行仕止之
間存乎識也

依豐氏增入

豐林按武攸緒市潁陽田共奴雜作自混於民今列爲潁人從其
志也

李蒙錢起經潁陽李蒙舊居詩有素溪引白鳥流涕弔芳蓀之句

依

豐氏增人

宋

王忠民，潯陽人，精通經史。靖康以後，數言邊事於朝，屢召不至。高宗南渡，忠民依商虢鎮撫使董先。時劉豫僭立，乃作九思圖以明天下之義。紹興初，翟宗薦其忠節，特授宣教郎。忠民上疏辭官，言臣憤金人無道，故三上書乞還二帝。本心報國，非冀名祿。上不許，忠民以誥置牘中，藏七寶山下，力懇去，遂不出。

依豐氏增入

明

谷之東

見前哲

張鳳質，博學能文，婚于孫孫許之望族，故貴冠蓋。謁者踵至，質絕跡。

不入其門數試秋闈不利有慨然出世想明季天下亂遂棄舉子業躬耕食力讀書自娛士之以操觚顯者武相接矣質竟臥疾不與諸生試質固無與于諸生而諸生亦竟未之知也

藝術

豐林按舊志列丹青醫術於一門然考之歷史則應別爲文苑方伎而人又無多也姑仍其舊蓋精神所注各有獨到者矣

明

賈誌字廷真性敏悟善畫山水兼工人物西遊關陝者數年流連忘返自是筆益雄秀所過之境與所見之人貌之輒能得其神骨名

噪一時嘗招遊公卿間

賈謙誌弟畫法其兄而天資尤異古人名畫仿之無不神肖唐王
一見驚爲奇童享年不永惜哉

安肅訓科琚子能讀父書者也

療人病應手奏效成名
入爲太醫與黃惠齊名中

清

梁峻嶺字蘭亭幼讀書善醫術尤精喉科外科自製丹藥療人病不
取值不索謝兼工山水然珍重不輕示人故其畫無傳者咸豐末
年皖匪之亂助守張潘寔獎九品銜

王樸業醫精於脈理而不求速效所療之疾多無後患人稱之

李樹元 銀樹立 崔鳳山

李銀崔三人者皆工丹青者也取法雖不同而後先名噪一時或謂李樹元山水花卉獨有妙思而銀樹立晚用指畫亦饒神趣若監生崔鳳山山水人物則以靈活見長矣

順治志伎術曷當於賢而靡詰長康輩故並三立不朽則以寫生起死各自成其獨至耳况夫盤桓宴如弄丸餘暇有脫然勢利塵空外者遂與潁水一瓢之致同稱大隱可也夫子曰游於藝子夏

曰小道可觀是焉得弁髦之而一切堙坳之

義民

明

王士榮正統六年施米一千石

呂信正統六年施米一千石

邢寬正統八年施米一千石

陳宣正統八年施米一千石

順治志以上四人俱賜勅嘉獎

乾隆志王士榮等四人於雍正六年入忠義祠

王虔成化三年大稔以積粟萬斛捐賑饑民邑侯張玠手書褒之
邢大定捐銀七十兩

楊丹嘉靖三十二年捐修學宮銀一百餘兩捐地二百畝作爲學田
陶鯨捐城甑銀五十三兩

袁尙志捐城甑銀一百五兩

王嘉祥捐夫工銀五十三兩

滕復性捐城甑銀五十七兩

韓學敏捐甄夫銀四十四兩

滕知性捐甄灰夫工銀五十六兩

曹含捐甄夫銀五十六兩

王宗舜捐夫工銀二十五兩

李志以上八人俱萬曆四十八年助修甄城姓名

清

田清玉字溫如花翎同知商橋人幼赤貧中年後家稍裕卽設本鎮義學茶亭其後獨修隍廟包填倉穀補修本鎮石橋添修本城書

院以及鄉間補修廟宇橋梁周濟貧乏善舉種種未易指數鄉里稱之無間言焉後長子心耕修郟境路次子雨春修王曲橋猶承其志云

陳金榜例貢兄弟友愛樂善好施光緒三四年間歲饑出穀數十石以賑貧乏并修本村道路及五龍廟神像有善人之目

申應選縣丞光緒二十二年與例貢郭應西同輸黃岡保上五二圖半倉穀

李芳洲光緒三十四年邑侯陳垣重修劉累墓芳洲施封樹地二畝

存縣備案

按舊志原文豐氏多所竄易往往失其本指茲照舊本改正其
可通者仍之闕者勿訝其文不類亦節取焉可也